

## **EPESAS** **Kipihac wê Pol kivuu vô tibii** **Epesas ge**

<sup>1</sup> A, Pol wê Anutu vinoo a ya xovôên wê ici va vông ge ên nêb a tu Yesu Kîlisi nu sinale ti. A kivuu kiyang tiga vô xam Epesas wê xam tu Anutu nue di xam vông i vin Yesu Kîlisi ge. <sup>2</sup> Mag Anutu yuu Apumtau Yesu Kîlisi, yuu i vông vizid nivîha hixôn kiyang malehe i lam dô hixôn xam.

### *Anutu vông vizid nivîha vô il*

<sup>3</sup> Il ob pimil Anutu wê il lig Apumtau Yesu Kîlisi ma yuu Anutu. Il tu Kîlisi nue, om Anutu vông vizid kîsîi ganê vihati vô il ên nêb he i ngîdu il xôn. <sup>4</sup> Taxlee ilage wê Anutu gên o tung lag yuu kibun lêm ge od vinoo il pyap lec yuac wê Kîlisi ob vông ge ên nêb il tu xomxo ngîbua wê nîpâên ti ob yêp vô il lêm ge. <sup>5</sup> Anutu xêyaa vin lec il, om ilage ici va vinoo il pyap ên nêb il tu i nue lec yuac wê Yesu Kîlisi vông ge. Anutu vông bêge ya xovôên wê ici va vông ge. <sup>6</sup> Om il ob pimil Anutu ên vizid nivîha yang wê vông pileva vô il ge. Anutu vông vizid tige vô il lec yuac wê nu tuc vông vô il ge. Anutu xêyaa vin lec nu tuc.

<sup>7</sup> Anutu xo vîgwe pisiv ên il luu vêl, om vô il vêl ên il nêd nîpâên ya Yesu hi di kîtya il nêd nîpâên vêl. <sup>8</sup> Om wê xo vîgwe pisiv ên il ge, ge vizid nivîha wê Anutu vông i lam hivun il xôn, di Anutu vông piyôp hixôn xovôên vihati vô il. <sup>9</sup> Ilage Anutu xovô yuac wê Kîlisi ob vông ge,

lêc yuac tige yêp xôpacên vô Anutu vaci. Dêc timuên lêc Anutu vông i tiyi xovôên wê yêp vô i ge om hîlung xovôên tige lam yêp seac vô il ên nêb il xovô. <sup>10</sup> Xovôên wê yêp vô Anutu ge bêga nêbê buc wê Anutu vînoo pyap ge od obêc kituc xomxo hixôn susu vihati wê dô lec kibun di wê dô vac lag ge lam dô vac Kîlisi kwa ngibi di i ob tu he nêb bazub.

<sup>11</sup> Anutu vông ya xovôên wê i vông ge om vînoo il ên nêb il tu i nue lec yuac wê Kîlisi vông ge. Ên Anutu obêc nêl kiyang ti ge od obêc vông i vô nôn lec tiyi xocbê kiyang wê yêp ilage.

<sup>12</sup> Anutu vông xolac mug lec xe Yuda taxlee di vînoo xe ên nêb xe pimil Anutu wê xêseac kehe ge.

<sup>13</sup> Xam êno, xam ngô Anutu kiyang nôn. Kiyang tige kiyang nivîha wê nêl bêga ên nêbê Kîlisi vô il vêl ên il nêd nîpaên. Xam ngô di vông i vin Kîlisi di tu i nue, om Anutu vông i tiyi kiyang wê hîlu pyap ilage di vông Myakîlôhô Ngîbua lam dô vac xam nîlôm tiyi xocbê Anutu vînoo xam pyap. <sup>14</sup> Myakîlôhô Ngîbua dô vac il nîlôd, om vông xovôên vô il bêga nêbê Anutu ob kô il mî il la dô hixôn i. Di Myakîlôhô Ngîbua obêc dô vac il nîlôd di i loc tyip lec buc timuên wê il ob la vô Anutu ge di ob sea il lêm. Om il ob xovô vizid wê Anutu vông vô il ge di pimil i lê i vô levac.

*Pol kitaa vô Anutu ên nêbê i vông xovôên vô tibii Epesas*

<sup>15</sup> A ngô wê xam vông i vin Apumtau Yesu di xam xêmyaa vin lec xomxo vông vinên vihati ge, <sup>16</sup> om a pimil Anutu tiyi buc vihati ên xam

di a o sea lêm, di a mi kitaa vô Anutu ên a nêb i ngidu xam xôn. <sup>17</sup> Anutu ge il Apumtau Yesu Kîlisi Anutu i di il Mag wê xêseac kehe ge. Om a kitaa vô Anutu ên a nêbê i vông xovôên nivîha wê i vông ge vô xam di nêl i kiyang kehe i yêp seac vô xam ên xam ngô di xovô Anutu. <sup>18</sup> A kitaa ên a nêb Anutu i vông xam piyôp i yêp seac ên xam xovô nôn nivîha wê Anutu nêl ên nêb obêc vông vô xam ge, di xam xovô vizid nivîha vîhati wê Anutu nêl xam lêm lec pyap mi i dô bin xam wê xam tu i nue ge. <sup>19</sup> Di a kitaa vô Anutu ên a nêbê i vông xovôên vô xam ên xam xovô bêga bê xêkizêc wê Anutu vông ge i ngidu il wê il vông i vin ge xôn. Xêkizêc wê Anutu vông ge luu xêkizêc vîhati vêl, om il o tiyi wê il ob yaxên mi xovô ge lêm. Xêkizêc levac tige vông yuac vac il nilôd, <sup>20</sup> di Anutu tipi vô Kîlisi kidi lec maviha vac yibên ya xêkizêc tige di vông i la dô vô Anutu vigê hiyôv gê kisii ganê. <sup>21</sup> Mêgem gwêbaga Kîlisi tu levac mi nginoo xomxo levac kibun ga vêl, di nginoo angela hixôn vimwo nipaên vîhati vêl, di nginoo susu hixôn xomxo vîhati vêl, di kô lê levac di nginoo xomxo lê levac vîhati vêl, he wê dô gwêbaga hixôn he wê ob dô timuên ge. <sup>22</sup> Anutu vông xomxo yuu susu vîhati la dô vac Kîlisi kwa ngibi, di vông Kîlisi tu xomxo vông vinên vîhati bazub. <sup>23</sup> Kîlisi hixôn xomxo vông vinên vîhati tiyi xocbê nôn tîbed, lêc Kîlisi tu bazub. Di Kîlisi viyum xomxo hixôn susu vîhati xôn di ici va tiyi lec vîhati, di i dô vac xomxo vông vinên vîhati nilô hixôn.

## 2

### *Anutu tipi vô il dô madviha hixôn Kĩlisi*

<sup>1</sup> Ilage xam mi vông môm nipaên yuu soên viyang viyang ge, mêgem xam dô tiyi xochê xam wib di la dô teva ên Anutu. <sup>2</sup> Vô buc tigeê xam la dô vac môm kibun ga, di timu vô môm wê Seten vông ge. Seten ge wê tu vimwo nipaên vihati nê levac, di gwêbaga i vông yuac vac he wê pwoo Anutu kiyang vac ge nilô. <sup>3</sup> Ilage il vihati dô tiyi xochê xomxo tibêgee di timu vô môm nipaên kibun ga, di vông môm nipaên tiyi xochê il nilôd kidu il ên nêb il vông ge, di il vông môm nipaên tiyi xochê il nidnivi yuu piyôp xovô ên nêb il vông ge. Om Anutu xêyaa vô myavinê vô il hixôn xomxo nipaên vihati ên nêb obêc kitya il vêl.

<sup>4-5</sup> Ilage môm nipaên wê il vông ge vông il dô teva ên Anutu tiyi xochê il xib. Lêc Anutu xo vîgwe pisiv ên il luu vêl, di xêyaa vin lec il luu il nêd nipaên vêl, om vông il dô madviha hixôn Kĩlisi. Môm tived wê Anutu xo vîgwe pisiv ên il ge, ge wê vô il vêl ên il nêd nipaên. <sup>6</sup> Anutu tipi vô il kidi lec madviha hixôn Kĩlisi di il tu Kĩlisi xe, om vông il lêd vô levac hixôn Yesu Kĩlisi gê kisii ganê. <sup>7</sup> Anutu vông bêge ên nêb xomxo vihati wê dô gwêbaga hixôn he wê obêc dô timuên ge, he i xovô bêga bê Anutu vông vizid nivihã vô il. Vizid nivihã tige bêga nêbê Anutu xo vîgwe pisiv ên il di vông Yesu Kĩlisi lam vô il vêl ên il nêd nipaên. Om vizid nivihã tige luu vizid vihati yang vêl. <sup>8</sup> Il vông i vin Kĩlisi om Anutu xo vîgwe pisiv ên il di vô il vêl ên il nêd nipaên. Lêc Anutu o vông vizid tige vô il ên môm nivihã ti wê il vông

ge lêm. Nge, vông pileva vô il. <sup>9</sup> Ên il nêd yuac nivihã ti yêpên ma wê ob kisuu Anutu ên i kitya il nêd nipaên vêl ge. Om xomxo ti o tiyi wê ob yong i vô Anutu ge lêm. <sup>10</sup> Anutu vaci tung il vihati di vông il vô paha lec, lec yuac wê Kîlisi vông ge, ên nêb il timu vô môp nivihã vihati wê i viac pyap ila ên nêb il ob la vac ge.

*Kîlisi kîruc xomxo viyang yuu tu nôn tîbed*

<sup>11</sup> Xam Epesas ge, xam o xomxo Yuda lêm. Nge, xam tibii ba. Xe Yuda, xe mi gôl nimnivi, ên môp tige wê Anutu vông vô xe Yuda ge. Om xe mi nêl kiyang lec xam bêga ên xe nêbê xam ge xomxo wê gôlên nimnivi ma ge. Om xam xovô bê ilage xam gên dô mamdiluhu. <sup>12</sup> Vixôhilôg, ilage xam le teva ên Kîlisi, di xam dô ninya ên xe Islel. Di Anutu hilu kiyang ên nêb obêc vông vizid nivihã vô xe Yuda, lêc o nêl bêga vô xam tibii ba hixôn lêm. Xam dô kibun ga, lêc xam o dô bin susu nivihã ti wê ob val vô xam timuên ge lêm, di xam lungên Anutu. <sup>13</sup> Ilage xam dô teva ên Anutu, lêc Kîlisi lam yib di kîpyax i hi sea ên nêb ob didii xam lôm vô Anutu. Om gwêbaga xam lam dô kwabo vô Anutu lec yuac wê Yesu Kîlisi vông ge. <sup>14</sup> Ên Kîlisi vaci tu il nêd malehe kehe. Ilage xe Yuda hixôn xam tibii ba, il xêdyaa vô nipaên vômã. Om môp wê il xêdyaa vô nipaên vômã ge tiyi xochê xenac levac ti wê le vac il mahigun, om xe Yuda dô vilu di xam tibii ba dô vilu. Lêc Yesu lam yib ên il vihati, mêgem dii xenac tige vêl di vông xe Yuda hixôn xam tibii ba il xôn dô kidu tîbed, <sup>15</sup> ên Yesu kitya Moses xolac hixôn kiyang yuu môp wê yêp vac

ge vihati vêl. Yesu vông bêge ên nêb ob kituc xe Yuda hixôn xam baba di vông il tu nôn paha tived, om vông il xêma nivîha mi dô vac kiyang malehe nilô. <sup>16</sup> Yesu yib lec xax ên nêb ob vông il vihati tu nôn tived di didii il xôn mi la vô Anutu. Om kitya môp wê il xêma nipaên ge vêl. <sup>17</sup> Kîlisi lam nêl kiyang nivîha vô il bêga nêbê ob vông il vihati dô vac kiyang malehe nilô. Om lam nêl kiyang bêge vô xam tibii ba wê ilage xam dô teva ên Anutu ge, di nêl vô xe Yuda wê xe dô kwabo vô Anutu ge hixôn. <sup>18</sup> Xe Yuda hixôn xam tibii ba ge, Myakîlôhô Ngîbua tived tax vuayen ên môp wê il xôn ob la vô Anutu ge lec Kîlisi tived.

<sup>19</sup> Mêgem gwêbaga xam o dô tiyi xocbê tibii ba wê vitevac ge lêm. Nge, xam tu Anutu nue pyap di lam kituc lec xe Yuda hixôn xomxo vông vinên vihati. <sup>20</sup> Il vihati tiyi xocbê xumac wê Anutu lox ge. Om Yesu Kîlisi vaci tiyi xocbê teac wê le vac kibun di xumac le lec ge, di xe sinale hixôn plopete, xe tiyi xocbê xax wê le lec teac ge. Di xam ge tiyi xocbê xax malecên wê le lec pêt ngîbi ge. <sup>21</sup> Di Yesu vaci ngidu xumac tige xôn, om xumac yêp nivîha di le xêkizêc. Anutu vaci lox xumac tige om obêc vô levac di tu Apumtau xumac ngîbua. <sup>22</sup> Xam êno vông i vin Yesu, om Anutu vîlu vô il vihati dô tived om il xôn vihati tu Anutu xumac ngîbua wê Anutu hixôn Myakîlôhô Ngîbua ob dô vac ge.

### 3

*Pol nêl xolac vô tibii ba wê o Yuda lêm ge*

<sup>1</sup> Anutu vông xe Yuda hixôn xam tibii ba tu nôn tived. Lêc tibii tung a Pol, a lam dô vac xumac kalabuhu ên wê a nêl Yesu Kîlisi xolac vô xam wê xam o Yuda lêm ge. <sup>2</sup> A xovô ên a nêbê xam ngô kiyang lec wê Anutu vông vizid vô a ge. Anutu vông vizid vô a bêga nêbê a loc vô xam tibii ba di nêl xêyaa vin lecên wê i vông ge kitong vô xam. <sup>3</sup> Ilage vizid wê Anutu vông ge yêp xôpacên. Mêd gwêbaga Anutu nêl mî i yêp seac vô a di a xovô. Om ga tiyi kiyang myabo wê a kivuu vô xam ilage. <sup>4</sup> Mêgem xam obêc kitong kîpihac tiga od xam obêc xovô bê piyôp wê a vông ge nêl kiyang xôpacên lec Kîlisi yêp seac. <sup>5</sup> Vô buc taxlee ilage Anutu o nêl kiyang xôpacên tige yêp seac vô xomxo ti lêm, lêc gwêbaga Anutu vông Myakilôhô Ngîbua lam nêl kiyang tige kehe kitong vô xe sinale hixôn he plopete wê Anutu vînoo xe ên nêb xe vông i yuac ge. <sup>6</sup> Om kiyang tige bêga nêbê Anutu kituc xe hixôn xam tu nôn tived pyap, om nôn nivîha vîhati wê Anutu nêb obêc vông vô xe Yuda ge od obêc vông vô xam êno hixôn. Di kiyang vîhati wê Anutu hîlu ilage ên nêb obêc vô nôn lec vô xe Yuda ge, od kiyang tige obêc vô nôn lec vô xam baba hixôn, ên xam vông i vin xolac nivîha wê Yesu Kîlisi vông ge.

<sup>7</sup> Anutu vông vizid nivîha vô a di vînoo a ên nêb a loc nêl xolac nivîha vô xam. Om vông xêkizêc wê i vông ge vô a ên nêb xêkizêc tige i ngîdu a xôn di a vông yuac. <sup>8</sup> A ga, a o levac lêm. Nge, Anutu nue vîhati ge ngînoo a vêl. Mêlêc Anutu vông vizid nivîha vô a bêga nêbê a loc nêl xolac vô xam tibii ba. Xolac tige nêl vizid nivîha

vihati wê Kilisi vông ge kitong. Lêc il piyôp o tiyi wê il ob xovô vihati ge lêm. <sup>9</sup> Anutu ge wê tung susu lag yuu kibun vihati, di ilage môp wê Anutu nêb ob vông ge yêp xôpacên vac i piyôp di i val tyip gwêbaga. Lêc gwêbaga Anutu vông yuac vô a ên nêb a loc nêl kiyang xôpacên tige i yêp seac vô xomxo vihati. <sup>10</sup> Anutu nêl kiyang xôpacên tige yêp seac vô xomxo vông vinên vihati ên nêb he levac levac hixôn xêkizêc kisii ganê, he i yê di xovô bê Anutu piyôp levac luu vihati vêl. <sup>11</sup> Buc taxlee ilage Anutu nêb ob vông yuac tibêge tiyi xochê xo mi yêp lec Apumtau Yesu Kilisi ên nêb Kilisi ob vông ge. <sup>12</sup> Mêgem gwêbaga il vông i vin Kilisi, om Kilisi vông môp vô il wê il ob la vô Anutu ge di il ob xona lêm. <sup>13</sup> Om a kitaa xam bê myavinê levac wê a kô ên wê a ngidu xam xôn ge, xam nilôm i o lêc vô viyin ên myavinê tige lêm. Ên myavinê wê a kilê lec xam ge ob vông xam lêm vô levac.

### *Pol kitaa vô Anutu ên tibii Epesas*

<sup>14</sup> Mag Anutu kituc xe Yuda hixôn xam baba ge lam dô kidu tived, om a yev vixag kitu vô Mag di pimil i lê. <sup>15</sup> Anutu nêl lê tived lec he wê dô lag puunê gee hixôn il wê il dô kibun ga ge. <sup>16</sup> Om a kitaa vô Anutu bêga bê xêseac nivaha wê yêp vô i ge i lam ngidu xam xôn, di i vông Myakilôhô Ngibua wê i vông ge i dô vac xam nilôm di xam le xêkizêc ta. <sup>17</sup> Di a kitaa vô Anutu ên a nêbê i vông Kilisi i lam dô vac xam nilôm ên wê xam vông i vin i ge, di i vông môp xêyaa vin lecên i vô levac vô xam ên xam le xêkizêc ya, i tiyi xochê xax ngilôhô la vac kibun di hôm yatôv xôn di i



le pilihi ge. <sup>18</sup> Ên xam obêc le xêkizêc vac môp xêyaa vin lecên ge od xam hixôn xe vông vinên vihati ge, il xôn obêc xovô môp xêyaa vin lecên wê Yesu vông ge. Xêyaa vin lecên wê Yesu vông ge levac di dia ngînoo la vêl di viyum vihati ge xôn, <sup>19</sup> di luu xovôên wê il vông ge vêl. Om a kitaa vô Anutu bêga bê i vông xovôên vô xam ên xam xovô xêyaa vin lecên wê Kilisi vông ge, di xêkizêc yuu xovôên di vizid nivîha vihati wê Anutu vông ge i lam hivun xam xôn. <sup>20</sup> Xêkizêc wê Anutu vông ge vông yuac vac il nilôd, om il obêc xo susu ti, me il obêc kitaa susu ti vô i ge od Anutu tiyi wê obêc vông vô il i luu wê il xovô me il kitaa vô i ge vêl. <sup>21</sup> Om il xomxo vông vinên vihati, il wê il dô gwêbaga hixôn he wê ob dô timuên gee, il obêc pimil Anutu lec yuac wê Yesu Kilisi vông ge i yêp luta lêc luta. Kiyang nôn.

## 4

### *Il hixôn Kilisi tiyi xocbê nôn tîbed*

<sup>1</sup> A ga, tîbii tung a lam dô vac xumac kalabuhu ga ên wê a nêl Apumtau xolac vô xam ge. Ilage Anutu tyuc xam ên nêb xam tu i nue, om a ob nêl kiyang vô xam bêga bê xam viac môp vihati i yêp nivîha i tiyi xocbê Anutu nêb il ob timu vô ge. <sup>2</sup> Om môp nivîha wê Anutu vông vô il ge bêga nêbê xam pilepac xam di vô nipwo lec, di xam lum nêl kiyang vôma, di le i lêc vông nîpaên vô xomxo wê vông viyin vô xam ge lêm. Nge, xam xêmyaa i vin lec lime di xam kilê viyin wê he vông vô xam ge. <sup>3</sup> Môp malehe wê Myakilôhô

Ngibua vông ge kisuu il lec di vông il le nôn tived. Mêgem xam vông yuac xêkizêc di hôm môp malehe xôn pilihi ên i ngidu xam xôn. <sup>4</sup> Il vihati tu nôn tived, di Myakilôhông Ngibua tived, di Anutu tyuc il vihati ên nêb il vông nilôd i loc vô nôn tived wê i obêc vông vô il timuên ge. <sup>5</sup> Il Apumtau tived, di vông vinên wê il vông ge tived, di il lipac mia lec lê tived, <sup>6</sup> di il Mag Anutu tived. Anutu tu il vihati nêd levac, di ngidu il vihati xôn, di dô vac il vihati nilôd.

<sup>7</sup> Kilisi titang vizid toto ge vô il ya xovôên wê i vông ge ên nêb ob vông vô il. <sup>8</sup> Mêgem kiyang wê yêp vac kipihac xolac ge vô nôn lec. Kiyang tige nêl bêga ên nêbê,

“Buc wê i lec mi lax kisii ganê ge od didii tibii wê vông vevac vô i léc i nginoo he vêl ge mi la hixôn, dêc titang vizid toto vô xomxo.”

<sup>9</sup> Kiyang nêl bêge, om bo ti wê nêbê lec mi la kisii ganê ge, kehe nêbê va? Kehe nêl bêga ên nêbê ilage i sea ben lag kisii ganê di lop mi lam kibun ga di la vac kibun nilô. <sup>10</sup> Om xomxo tyo wê lop mi lam kibun ga ge wê lec mi lax kisii ganê tii vac nang di luu lag vêl, om dô i nêx lec lag yuu kibun vihati. <sup>11</sup> Di Kilisi vông vizid yuu xovôên toto vô xomxo ên nêb he i vông he yuac ya. Om vông yuac sinale vô xomxo ya, di vông yuac plopete vô xomxo ya, di vông yuac xolac nêlên vô xomxo ya ên nêb he i loc nêl xolac vô tibii madiluhu, di vông yuac pasto vô xomxo ya ên nêb he i viac xomxo vông vinên di tixuu he ya xolac. <sup>12</sup> Kilisi vông yuac tigeê vô xomxo ya ên nêb he i ngidu il xomxo vông

vinên vihati xôn di il vông yuac wê Kîlisi vông vò il ge i yêp nivîha. Il hixôn Kîlisi tiyi xocbê nôn tîbed. Om yuac wê il vông ge ob vông nôn tige vò levac di ngîdu vông vinên wê il vông ge xôn. <sup>13</sup> Mêgem yuac tige i vò levac vò il di i loc vò buc wê il xomxo vông vinên vihati obêc le xêkizêc vac vông vinên, di kô xovôên tîbed lec Anutu nu tuc, di il ob tu xomxo nivîha tiyi xocbê Kîlisi ge. <sup>14</sup> Mêgem il ob dô tiyi xocbê nue nipwopwo ge lêm. Ên xomxo kityooên obêc tixuu nipwo ya xolac ba ti, me didii he mi la vac môp kityooên ge od ob vò pilepac pilepac vò he tiyi xocbê gwec vuac di pilepac dipac di lea vò pop pop vò dipac la di lôm ge. Om il ob dô tiyi xocbê nipwopwo tibêgee lêm. <sup>15</sup> Nge, il ob dô tiyi xocbê xomxo levac di nêl kiyang hixôn nôn vòma di xêdyaa i vin lecma, ên il obêc timu vò môp tibêgee ge od il ob le pîlihi hixôn Kîlisi wê tu il badzub ge. <sup>16</sup> Il hixôn Kîlisi tiyi xocbê nôn tîbed, lêc Kîlisi tu bazub di il ge tiyi xocbê vîxa yuu vigê di manôn yuubê. Di bazub vông ngang vihati kitucma di tu nôn tîbed. Om ngang toto obêc vông he yuac toto nivîha ge od nôn tige ob dô nivîha di lig mi vò levac di ob vò xêkizêc lec ya môp xêyaa vin lecên.

*Xomxo vông vinên ob tup vò môp paha*

<sup>17</sup> A ob nêl kiyang ti vò xam. A tu Apumtau manôn om a nêl xêkizêc vò xam bêga bê le i lêc vông môp i tiyi xocbê tibii madîluhu vông ge lêm, ên he vông nîlô la vò môp vaxvax wê nôn ti yêp vacên ma ge, <sup>18</sup> di mapîtoc hivun he pîyôp xôn. He lungên Anutu di he nêb he ob ngô

kiyang nôn lêm, om he dô ninyawehe ên maviha dôên wê Anutu vông ge. <sup>19</sup> He ni o yoc ên môt nipaên wê he mi vông ge lêm. Nge, he vông he la diluhu vô môt yôdac vêx yuu vux, di he doma vô môt ningeac vihati.

<sup>20</sup> Mêlêc Kîlisi o didii xam vac môt tibêgee lêm. <sup>21</sup> Nge, a xovô ên a nêbê ilage xam ngô kiyang lec Kîlisi, di xomxo tixuu xam ya Yesu kiyang nôn. <sup>22</sup> Kiyang tige nêl bêga ên nêbê ilage xam mi timu vô môt nipaên wê xomxo ngwe vông ge, om kityoo xam di didii xam la vac môt nipaên wê xam nimnivi xovô ge. Lêc môt nipaên tige wê ob kitya xam vêl. Om xam sea môt wê xomxo nipaên tige vông ge i loc yêp xel. <sup>23</sup> Di xam pilepac nilôm yuu piyôp i vô paha lec, <sup>24</sup> di xam hêm môt wê xomxo paha ngwe vông ge lec. Môt wê xomxo tige vông ge ngibua di xêseac nôn tîyi xocbê Anutu vaci.

<sup>25</sup> Mêgem xam sea kiyang kityooên i loc yêp xel di nêl kiyang nôn vôma, ên il vihati tu nôn tîbed pyap. <sup>26</sup> Xam xêmyaa obêc vô myavinê vôma ge od xam viac xam, ên xêyaa myavinê i o lêc vông xam loc vac nipaên lêm. Di le i lêc dô hixôn xêyaa myavinê di hiyôv i hoo loc hixôn lêm, <sup>27</sup> ên xam obêc tax vuayen vô Seten di i ob didii xam la vac môt nipaên. <sup>28</sup> Xomxo wê mi vông yôdac vô xomxo ngwe susu ge i o lêc vun xomxo susu i tii vac lêm. Nge, ici va vigê i vông yuac nivîha êdêc kisuu susu lec di vông ya vô xomxo wê nêl susu maên ge. <sup>29</sup> Le i lêc nêl kiyang nipaên lêm. Nge, xam nêl kiyang nivîha wê ob ngîdu xomxo xôn ge ên i vô nivîha vô he wê ob ngô

kíyang ge. <sup>30</sup> Le i léc vông viyin vô Myakilôhô Ngibua wê Anutu vông ge lêm, ên Myakilôhô Ngibua lam dô vac il nilôd tiyi xocbê il tu Anutu nue om vông xovôên vô il bêga nêbê il ob la dô híxôn Anutu timuên. <sup>31</sup> Xam sea môp nipaên wê xam xêmyaa vô nipaên vô xomxo ngwe ge, di môp kunacmaên, di môp xêyaa myavinê, di môp hígacên, di môp wê xam nêl kíyang nipaên lec xomxo ge, di sea môp nipaên vihati i loc yêp xel. <sup>32</sup> Xam vông nivíha vôma di xo vígwe pisiv ênma, di xomxo ti obêc vông nipaên vô xam ge od xam kítýa i nên nipaên vêl i tíyi xocbê Anutu kítýa xam nêm nipaên vêl lec Yesu Kílisi lê ge.

## 5

### *Il dô vac xêseac om il ob timu vô môp nivíha*

<sup>1</sup> Anutu kítýa xam nêm nipaên vêl di xêyaa vin lec xam, di xam tu i nue. Om a nêl vô xam bêga bê xam timu vô môp wê Anutu hílung vô xam ge, <sup>2</sup> di xam timu vô môp xêyaa vin lec maên i tíyi xocbê Kílisi wê xêyaa vin lec il om yib ên il nêd nipaên ge. Kílisi vông ici va tu daa wê Anutu yê nivíha ge, tíyi xocbê ilage xomxo si daa wê nivivea nivíha ge ên nêb Anutu i yê nivíha.

<sup>3</sup> Le i léc timu vô môp yôdac vêx yuu vux di môp ningeac lêm, di xam o vông nilôm i loc vô susu vax vax lêm, di le i léc keac lec môp nipaên tibêgee lêm. Ên il Anutu nue il, om o tíyi wê il ob nêl kíyang lec môp nipaên tibêgee lêm. <sup>4</sup> Le i léc nêl kíyang yôdac lecma lêm, di le i léc nêl kíyang xêlila lec kíyang nipaên lêm, di le i léc nêl kíyang vídaaên wê nôn maên ge lêm, ên kíyang

tibêgee tiyiên ma, om xam sea i loc yêp xel di xam pimil Anutu. <sup>5</sup> Xacxam va xovô pyap bêga bê xomxo wê vông môp yôdac vêx yuu vux ge, me vông môp ningeac, me vông nilô la vô susu vaxvax ge, he obêc la dô vac Anutu yuu Kîlisi ben lêm. Di a nêl vô xam bê xomxo wê vông nilô la vô susu vaxvax ge, he tiyi xochê he yev vixa kitu vô anutu kityooên.

<sup>6</sup> Xam viac xam, ên xomxo kityooên obêc val nêl kiyang vidaaên vô xam ên nêb ob didii xam mi la vac môp nipaên ge od xam o lêc ngô kiyang wê he vông ge lêm. Ên Anutu xêyaa vô myavinê vô xomxo wê pwoo i kiyang vac di timu vô môp nipaên tibêgee. <sup>7</sup> Mêgem xam dô teva ên xomxo wê vông môp nipaên bêgee, <sup>8</sup> ên ilage xam dô vac mapitoc, lêc gwêbaga xam tu Apumtau nue, om xam dô vac xêseac. Mêgem xam timu vô môp wê xomxo xêseac vông ge, <sup>9</sup> ên xomxo obêc dô vac xêseac ge od ob timu vô môp nivîha yuu bôbac di dô vac kiyang nôn hixôn. <sup>10</sup> Di xam myag môp wê Apumtau obêc yê nêb nivîha ge. <sup>11</sup> Xomxo wê mi dô vac mapitoc ge, he mi timu vô môp wê ob vô nôn nivîha lêm ge, om le i lêc timu vô he lêm. Nge, xam nêl he nêb nipaên kitong vô he. <sup>12</sup> Lêc a ob nêl kiyang lec môp wê he vông mi i yêp xôpacên ge lêm, ên ob vông ni yocên vô a. <sup>13</sup> Lêc xêseac obêc linac lec môp yuu susu vihati ge od he ob dô seac di ti ob dô vac mapitoc lêm. Ên susu vihati wê xêseac tige linac lec ge, he tiyi xochê xêseac nôn. <sup>14</sup> Mêgem kiyang ti yêp bêga ên nêbê,

“Ông wê ông wêp ge, ông kidi lec mamvîha

di sea môm mayibên, ên xêseac wê Kîlisi vông ge i linac vô ông.”

<sup>15</sup> Om xam viac xam ên môm wê xam timu vô ge, di xam o léc dô i tiyi xomxo wê lungên Anutu ge lêm. Nge, xam dô i tiyi xocbê xomxo wê xovô Anutu ge, <sup>16</sup> di xam xovô môm nivihâ wê Anutu vông ge i tiyi buc vihati, di xam o sea buc ti i yêp vidaaên lêm, ên buc gwêbaga il dô vac viyin. <sup>17</sup> Mêgem xam o dô i tiyi xocbê xomxo wê piyôp maên ge lêm. Nge, xam xovô môm wê Anutu vông vô xam ên nêb xam timu vô ge.

<sup>18</sup> Le i léc num mia xêkizêc di i vông xam piyôp i vô yacyac lêm, ên môm tibêge ob vông xam vô nipaên. Om xam sea môm tibêge di lam dô vac Myakilôhô Ngibua kwa ngibi ên i hivun xam xôn. <sup>19</sup> Om kiyang wê xam keac voma ge, xam keac di vông lilo wê pimilên Anutu ge, hixôn lilo daa, di lilo wê Myakilôhô Ngibua vông vô xam ge, di xam vông lilo vô Apumtau vac myam di vông vac nilôm hixôn, <sup>20</sup> di i tiyi buc vihati xam pimil Anutu lec il lig Apumtau Yesu Kîlisi lê ên viyin yuu nivihâ vihati wê val vô xam ge.

### *Kiyang lec môm iimaên*

<sup>21</sup> Xam pimil Kîlisi di kô i lec, di xam loc dô vac lime vông vinên kwa ngibi i tiyi xocbê môm wê Kîlisi hilung vô xam ge. <sup>22</sup> Xam vêx, xam ngô kiyang wê liyame nêl ge di loc vac he kwa ngibi i tiyi xocbê xam ngô Anutu kiyang di la vac i kwa ngibi ge, <sup>23</sup> ên liyame ge tu xam bamzub tiyi xocbê Kîlisi tu il wê il vông i vin ge badzub. Il hixôn Kîlisi tu nôn tived, di Kîlisi vaci vô il vêl ên il nêd nipaên. <sup>24</sup> Il wê il vông i vin ge, il dô vac

Kilisi kwa ngibi, om xam vêx êno, xam loc vac kiyang wê liyame vông ge kwa ngibi i tiyi buc vihati.

<sup>25</sup> Xam vux, xam xêmyaa i vin lec vinême i tiyi xochê Kilisi xêyaa vin lec il xomxo vông vinên vihati, om lam yib lec il nêd nipaên, <sup>26</sup> ên nêb ob lipac il vô paha lec ya mia hixôn xolac wê ici va vông ge, di vông il vông vinên vihati il tu i nue. <sup>27</sup> Kilisi vông bêge ên nêb ob vông il tu xomxo nivîha wê ningeac yuu byepacên ti me susu nipaên ti ob dô hixôn il lêm. Nge, il ob tu xomxo ngîbua wê judaên ti ob yêp hixôn il lêm ge. <sup>28</sup> Kilisi vông bêge, mêgem xam vux, xam xêmyaa i vin lec vinême i tiyi xochê xam xêmyaa vin lec xacxam va nimnivi ge. Vux ti xêyaa obêc vin lec vinê ge od tiyi xochê xêyaa vin lec ici va, <sup>29</sup> ên xomxo ti ob vông myavinê vô ici va ninivi lêm. Nge, ob vet ninivi di viac nivîha tiyi xochê Kilisi viac xomxo vông vinên vihati nivîha ge, <sup>30</sup> ên il tiyi xochê Kilisi vîxa yuu vigê di manôn yuubê, om il hixôn Kilisi tiyi xochê nôn tîbed. <sup>31</sup> Kiyang yêp vac xolac bêga nêbê,

“Mêgem vux ti obêc kô vêx ge od ob sea ta yuu ma di la dô hixôn vinê, di yuu ob tu nôn tîbed.”

<sup>32</sup> Xolac nêl bêge, lêc kiyang ga kehe yuu. Kehe ngwe wê levac ge nêl lec Kilisi hixôn xomxo vông vinên. <sup>33</sup> Di ngwe nêl lec môp wê vêx hixôn vux iimaên ge, om xam vux, xam toto xêmyaa i vin lec vinême i tiyi xochê xam xêmyaa vin lec xacxam va nimnivi ge. Di xam vêx, xam pimil liyame lê di kô he lec.



## 6

### *Kiyang lec nue hixôn tae mae*

<sup>1-2</sup> Xam nuge, xam tu Apumtau xe, om xam vô ninyam lehe vô tame mame kiyang, ên ge môp bôbac wê xolac nêl ilage bêga ên nêbê, “Xam hôm tame mame lê lec di ngô he kiyang.” Xolac tige Anutu hilu taxlee bêga ên nêbê, <sup>3</sup> “Xam obêc vô ninyam lehe vô kiyang wê tame mame nêl ge od xam obêc dô nimviha di dô mamviha buc dia gê kibun ga.” Anutu nêl bêge ilage.

<sup>4</sup> Xam mae, le i léc kunac nume i luu vêl mi vông he xêyaa i vô myavinê vô xam lêm. Nge, xam viac he i nivîha di titô he di tixuu he ya Apumtau xolac.

### *Kiyang lec xomxo levac hixôn nue yuac*

<sup>5</sup> Xam wê xam tu xomxo levac nue yuac ge, xam loc vac kiyang wê xomxo levac vông ge kwa ngibi, di xona ên he di xam nilôm i o léc vông yuu lêm. Nge, xam nilôm i loc tibed vô yuac wê xam ob vông ge, di xam timu vô xomxo levac vya i tiyi xocbê xam timu vô Kîlisi vya ge. <sup>6</sup> Le i léc kityoo di hi xomxo levac manôn lec ya yuac lêm, ên ge tiyi xocbê xam nêb xomxo i yê xam nivîha. Om xam vông xam yuac kibun ga i yêp nivîha i tiyi xocbê xam vông yuac nivîha vô Kîlisi ge od ge tiyi xocbê xam vông ya xovôên wê Anutu vông ge. <sup>7</sup> Xam vông xam yuac kibun ga hixôn xêmyaa nivîha, di vông yuac vô xomxo kibun ga i tiyi xocbê xam vông yuac vô Anutu. <sup>8</sup> Xam xovô bê xomxo ti obêc vông i yuac i yêp nivîha ge od Apumtau ob vông nôn nivîha vô i. Om Apumtau obêc vông nôn nivîha vô he wê tu xomxo levac

nue yuac ge di ob vông vô he wê lê levac ge hixôn.

<sup>9</sup> Xam xomxo levac wê xam viac nume yuac ge, xam vông nivîha vô nume yuac, di le i léc higac di vông he i xona lêm, ên xam xovô bê Apumtau wê dô kisii ganê ge tu xam nê m levac di tu nume yuac nê m levac êno, di Apumtau o yê il mangwe levac di mangwe nipwo lêm. Nge, yê il vîhati tiyima.

*Susu vevac wê Anutu vông vô il ge*

<sup>10</sup> A ob nê l kiyang xêxuhu ya hixôn bêga bê xam tu Apumtau xe pyap, om xam le pîlihi ya xêkizêc wê Apumtau vông vô xam ge. <sup>11</sup> Xam vînyum susu vevac wê Anutu vông vô xam ge lec xam nimnivi xôn di le xêkizêc di vông vevac vô Seten di pwoo kiyang kityooên wê i vông ge i pec. <sup>12</sup> Ên il o vông vevac vô xomxo kibun ga lêm. Nge, il vông vevac vô vîmwo nipaên hixôn angela nipaên di Seten he nue yuac hixôn xêkizêc levac wê viac mapitoc ge. <sup>13</sup> Om xam vînyum susu vevac wê Anutu vông vô xam ge lec xam nimnivi xôn, di buc nipaên wê Seten nê b obêc vông vevac vô xam ge od xam ob le xêkizêc vac vevac di ngînoo Seten vê l mi le pîlihi.

<sup>14</sup> Mêgem xam le xêkizêc di vînyum susu vevac wê Anutu vông vô xam ge lec. Susu vevac tigeê bêga bê xam vêx Anutu kiyang nôn i tiyi xocbê let, di xam vînyum môt nivîha i kisuu xam lec i tiyi xocbê ngakwi xêkizêc wê kisuu xam pikopac lec ge. <sup>15</sup> Anutu xolac nivîha nê l ên nêbê Anutu vông il la dô vac kiyang malehe nilô, om xam nê l xolac tige mi le xêkizêc vac i tiyi xocbê su

wê xam su lec vixam xôn ge. <sup>16</sup> Om xam vinyum susu vevac tigeec lec xam nimnivi xôn, di xam hóm vông vinên wê xam vông ge xôn pilihi i tiyi xocbê êê wê kisuu xam lec ge, êdêc Seten obêc byêx yii wê ngwax tum lec ge lam ge od i lam selac lec vông vinên wê xam vông ge di xam le nivîha. <sup>17</sup> Xam xovô pyap ên xam nêbê Anutu vô il vêl ên il nêd nipaên, om xam hóm xovôên tige xôn pilihi i tiyi xocbêxam tung kilung xêkizêc ta lec bamzub ên nêb i kisuu bamzub lec ge. Xam hóm yipac levac wê Myakilôhô Ngibua vông ge. Yipac tige Anutu xolac nôn. <sup>18</sup> Xam kitaa vô Anutu i tiyi buc vihati ya xêkizêc wê Myakilôhô Ngibua vông vô xam ge, di xam kitaa lec môp toto wê xam vông ge. Xam viac xam di hóm môp kitaaên xôn pilihi di seaên i ma, di xam kitaa lec xomxo vông vinên vihati ên Anutu i ngidu he xôn. <sup>19</sup> Di xam kitaa vô Anutu lec a êno bêga bê Anutu i ngidu a xôn ên a xonaên ên xomxo ti i ma di a myag i vô viyin maên di a nêl xolac wê yêp xôpacên ilage i yêp seac. <sup>20</sup> A ga wê Anutu vông a la nêl xolac, om gwêbaga tibii tung a lam dô vac xumac kalabuhu ga ên wê a nêl xolac ge. Mêgem xam kitaa vô Anutu bêga bê i vông xêkizêc vô a ên a xonaên i ma di a nêl Anutu xolac vô xomxo vihati i tiyi xocbê yuac wê Anutu vông vô a ge.

### *Kiyang viwen timuên*

<sup>21</sup> Tikikas ob nêl a kitong vô xam di nêl yuac wê a vông vac vigwe ga kitong êno. Tikikas ge il lig vông vinên ti wê il xêdyaa vin lec i ge, di i vông yuac nivîha vô Apumtau ge. <sup>22</sup> Om a vông

i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nêlôm i vô viyin maên.

<sup>23</sup> Mag Anutu yuu Apumtau Yesu Kîlisi, yuu i vông kiyang malehe hixôn xêyaa vin lecên đi vông vinên nôn i loc vô xam wê a lige ge. <sup>24</sup> Vîzid nivîha wê Anutu vông ge i loc vô xomxo vîhati wê xêyaa vin lec il lig Apumtau Yesu Kîlisi tîyi buc vîhati đi ob tîyôô vac lêm.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 22 Feb 2024 from source files dated 31 Aug 2023

3d2c844d-4bc8-590b-bbf2-3a5fcd1f7ad8